



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma : Tir Yimym

tiryimym@aolima

tir yimym

TAPAK 3



Ukraine tarutsü tia anüdoklen tongpang nung keta lir: Zelenskyy

Aikati BJP ticket raktep baji tim dang: Karnataka CM Bommai



VOL. XX NO. 153 (ADOK 153) DIMAPUR YANGTEPNÜ (THURSDAY) METSÜREMI (MARCH) 16, 2023 ₹ 5.00

Khanrinla T. Koza-i Nagaland Upa-Lokayukta inyaker

Dimapur, March 15, 2023 (TYO): Nagaland Governor La. Ganesan-i Upa-Lokayukta Khanrinla T. Koza nem tezüngzüktep agidaktsüo.

March 16, 2023 nü Raj Bhavan, Kohima nung iba sentong agia liasü aser Governor-i Upa-Lokayukta

Khanrinla nem tenüngsang agütsü.

Iba sentong nung Lokayukta, Nagaland Banuo Z. Jamir, Chief Secretary Nagaland J. Alam IAS, DGP Rupin Sharma IPS, Lokayukta ketdangsurtem, taoba Minister Neiba Kronu aser tanga sorkar ketdangsurtem aden.

Deputy CM T.R. Zeliang-i mezüngbuba NH senden amen

Dimapur, March 15, 2023 (TYO): Bodbar nü Deputy Chief Minister T.R. Zeliang-i National Highway Department indang mezüngbuba Coordination Meeting ayonga menogo.

April 5, 2023 nü G-20 Business Meet alitsü aser iba dak sendakba nung Dimapur-Kohima-Kisama adena süiba National Highway maparen indang senden nung benoka lemsatep.

Deputy Chief Minister T.R. Zeliang-i National Highway aser Planning & Transformation mapatem lemezüka lir.

G-20 Business Summit nung alima tesem balala nungi teshimtet nübotem arutsü anungji Department aser Agencies-i tekaratiba nung March ita matemdangsa iba lenmang

yanglushitsüla, ta Zeliang-i ashi. Pai akokba tashi yariteptsü aser telok ajak tsüingda amalitep alitsü atema iba mesükba sendentem mapang shia amentsü ta Zeliang-isa ashi.

Iba senden nung Works & Housing Commissioner & Secretary Kesonyu Yhome IAS-i tang teinyakdak osang lemsatep aser March 20, 2023 tashi nung mapa ajak tembangtsü tetuyuba agüja lir ta ashi. Tawa tasen shimba NHIDCL Executive Director aser General Manager natia NHIDCL ajanga mapa inyakba osang lemsatep aser mapang shitak nung maparen ajak tembangtsü nangzüik.

State sorkarisa Kohima aser Chumoukedima DC dangi osang yoktsü atema senden nungsa jembitep.

Nagaland nung tsüngküm arur; tatsükba akümer

Dimapur, March 15, 2023 (TYO): Tesüiba anogo 30 tsüingda Nagaland nung maximum temperature 23.0° aser minimum temperature 12.9°C liasü.

Maneni kasa mapang tatsük 65.5% aser tzüinglu 99.4mm aru ta Joint Director Soil & Water Conservation & Meteorology atema State Nodal Officer Rongsenlemzung-i sangdong ka nung ashi.

Nagaland nung tatsük tibaji Jalukie nung aliba Meteorological observatory ajanga record asü aser ibaji March 15 nü 35.0°C

liasü. Külen, temekongtibaji February 20 nü Zunheboto nung 8°C liasü, ta paisa ashi.

Nagaland nung tesüiba anogo 30 tsüingda tzüinglu teimtiba arubaji 34.0mm liasü aser ibaji March 15, 2023 nü Sechu Observatory nung record asü.

Taruba anogo ishika Northeast India nung tzüinglu arutsüm tsüingmok aser tsüing dena mopung tashi agi aontsü. March 15 nungi 17 tashi nung iba ya ataloktsü ta National Weather Forecasting Centre (IMD)-i metetdaktsüo.

IMD-i Northeast nung 'Orange Alert' agütsü

Guwahati, March 15, 2023 (Agencies): Bodbar nungi Northeast nung tzüinglu arur aser rü dena tsükogo. Tanü Gangtok nung rü yipru ka süi aser Sikkim kübok tesem aika nung tzüinglu kanga arua liasü.

March 15 nungi March 18 tashi Arunachal Pradesh, Assam, Meghalaya, Nagaland aser Manipur nung tzüinglu kanga arutsü aser Mizoram, Tripura o Sikkim nunga

tzüinglu terara arutsü ta Indian Meteorological Department (IMD)-i metetdaktsüo.

Mongulbar nü Northeastern region ya "Orange Alert" nung liasü. Ajisüaka IMD-i Assam, Meghalaya, Nagaland, Mizoram, Manipur aser Tripura atema "Yellow Alert" melentsü imlaba shiogo saka Sikkim o Arunachal Pradesh nungbo tsüingsang kanga majungtsü ta metetdaktsüo.

KLO züngsemtem Nagaland nung temai adok

Dimapur, March 15, 2023 (Agencies): Kamtapur Liberation Organisation (KLO) Foreign Secretary Pavel Koch-i anir nisung 7 tashi Nagaland kübok Mon district nung temai adokogo.

March 15, 2023 nü Indo-Myanmar arrtsü anasa aliba Longwa yimtsüing nung parnok sepaitem tsüingdang temai adok ta osang angazüker.

Kilonser-cum-Chairman aser Konyak region & western Nagaland in charge A Khampei-i KLO züngsemtem anir adok. Iba maparen ya Assam Rifles aser Special Branch, Guwahati ajanga inyak.

Tanü temai adokba KLO züngsemtemji taonung Mon nung yipzüksü aser iba sülen asüing Guwahati-i anir aotsü ta osang ajanga metetdaktsü.

Nagaland Municipal Act 2001 meyanglushira ULB election magidaktsütsü



AWUMT pur 'Aongza Ki' nung federal assembly amenba mapang tangokba noksa nung angur.

Mokokchung, March 15, 2023 (TYO): Nagaland sorkari March 9, 2023 nü Nagaland tesem balala nung Urban Local Bodies election agitsü sangdongba sülen iba dak sentakba nung All Ward Union Mokokchung Town (AWUMT) 'federal assembly' rondak senden ka March 15 nü Aongza Ki, Mokokchung nung amen.

Iba senden nung AWUMT kübok ward 18 nungi yimden yimsüsür ajak sendena Nagaland Municipal Act 2001 aser ULBs election dak sentakba nung tatsü talang ajak asadangtepa jembir külen teloki bangzüng ana (2) renema ayu, ta AWUMT tir

Limanungsang aser Tongti Zülur Jongpongtemjen nati sangdong ka ajanga metetdaktsü.

Mezüngbuba bangzüngji; 'Nagaland Municipal Act 2001' dak sentakba nung yaküm September 19, 2022 nü Kohima Municipal Ward Panchayat (AKMWP), Dimapur Urban Council Chairmen Federation (DUCCF) aser All Ward Union Mokokchung Town (AWUMT) ajanga Nagaland Govt. dang iba Act kübok Arla kobaisa Naga nungner nem agütsüba temeten "Article 371 (A)" atsü nungpoka (infringe asür) aitter, itemji yanglushir (Amendment agir) tekaratiba nung ULB election-ji

agitsüla ta zülua lir

Ibaji mataloktsü tashi Mokokchung town nung ULB election agitsü memelatsü. Amendment magi sür Govt.-i election-ji tashiyim agi agitsü merangra Naga nungner temeten wazüka ayutsü asoshi tim lenmangtem bushitsü ta AWUMT-i lemetet.

Tanabuba nung, Govt.-i Nagaland Municipal Act 2001 taginüba ama memelenshi ULB election ji agitsü merangra, 18 ward telongtet nung shinga election aitsü asoshi nomination file mesüdaktsütsü bangjemogo, ta AWUMT ketdangpurtemisa metetdaktsü.

SC-i Centre dang Mao nungner noktanga reprangshimtsü tuyur

Imphal, March 15, 2023 (Agencies): Nagaland nung Southern Angami Public Organisation (SAPO)-i Manipur nung Mao nungner noktanga atema Public Interest Litigation (PIL) ka benoka alibaji Centre sorkari repringang ta Supreme Court-i tetuyuba agütsüo.

Mao-Imphal Market Co-Ordination Committee convener aser IPSA vice-president Khurajam Athouba-i iba dak sendakba PIL ka benoka lir.

Hombarnü Supreme Court nung Chief Justice DY Chandrachud, Justice PS Narasimha, aser Justice JB Pardiwala nungner adenba bench-i iba PIL mezüing angadangogo.

Idangji SC bench-i India sorkar dang Nagaland nung Southern Angami kintem aliba lushi aser National Highway 2

(Asian Highway No.1) ajanga Mao nungner noktanga ken o atema mapa inyaktsü tetuyuba agütsü.

December 15, 2022 nungi Southern Angami Public Organisation (SAPO) aser Southern Angami Youth Organisation (SAYO) teloktemi parnok lushi nung Mao nungner noktanga lir. Iba ajanga Mao nungner garitem rondoktsüba aser nisungtem merenshi tatalokbatem ajangshogo.

Koziirii Forest nung 32.29 sq. km aser Dzuko valley nung 11.28 sq. km (asemsü nung ana) Mao nungner lushi lir saka Southern Angami nungner iba atema tenokdangba agütsü. Tesüiba mapang kin hohotem ajanga iba ken o angatetteptsü merangogo saka makok, ta PIL benoker Khurajam Athouba-i shia lir.

Tesüiba anogo 105 tashi Nagaland state sorkari mesüra India sorkari Mao nungner kümzüka ayutsü atema mapa kecha meinyaker aser iba jagi Supreme Court nung PIL benoktsüsa akümer, ta paisa ashi. February 2023 nung pai PIL ya benok aser iba nung Mao nungner temetentem kümzüka ayutsü indang shia lir.

PIL nungsa Mao nungner security peria agütsütsü aser SAPO o SAYO ajanga Mao nungner dak tashiyim mapa inyakba atema teyari agütsütsü aser iba telok ana ya Unlawful Activities (Prevention) Act, 1967 nung Section 3 kübok ozüingi noktangtsü asüingdanga lir.

Supreme Court-i iba ken o ya kanga rongdak ta shia March 20, 2023 nü ano angadangtsü anogo shimogo.

NSCN/GPRN (Khango)-i moko noktanga ya tim masü: CNCCI

Dimapur, March 15, 2023 (TYO): Tawa NSCN/GPRN (Khango)-i moko noktanga atema state sorkari nungi ola kecha maliba atema kanga süngmanger, ta Confederation of Nagaland Chamber of Commerce and Industry (CNCCI)-i metetdaktsü.

CNCCI-i moko achiba pusema menungiter saka state sorkari moko ya 'banned substance' mesüra 'legal product' jangjatsüla kechiyong tobacco products ayokba nungi GST agir, ta CNCCI-i ashi.

"State sorkarisa ibala maparen parnoki ketdangtsüa repringtsü asü mesüra kar nem inyaktsü lemezükja lir yimjak nung metetdaktsütsü tim. Nagaland state sorkari Naga nungner dang

shir bangdak aser ketdangsubaren sülen anidaktsü'ar metetdaktsütsüla kechiyong state sorkar tetuyubatem alema tanga tetuyuba aser tenokdangba aika agütsür" ta Media Affairs, CNCCI sangdong ka nung shia lir.

State sorkari item onük atema kuli tejangja magütsür shishilembartemibo Nagaland nung sorkar ketdangsubaren mali ta züingshitsü, ta CNCCI-isa metetdaktsü.

NSCN-K ajanga ozüingi memelaba drugs aser yi noktanga nung CNCCI-ia pusema nungiter kechiyong drugs ya alima ajungalen noktanger aser yi ya state sorkari noktanga lir ta Media Affairs

sangdong nungsa shia lir.

"Shishilembartemibo license shitak bener aser state sorkar nem GST tagütsütsü tim agütsür ozüingi melaba ama tobacco products ayoker, anungji NSCN-GPRN (Khango) ajanga noktanga nungi Tobacco products agentsü mepishir" ta CNCCI-isa metetdaktsü.

Nagaland nung shishilembartemibo Indo-Naga yimten latettsüba maparen pusema nungiter aser Naga yimten telok balala dang tekaraba nung iba ya mapa akümstü mepishir. Indo-Naga yimten latettsüba maparen nung shishilembartemibo tesüiba nunga yaria aruogo aser ano maneni yaritsü ta Media Affairs, CNCCI-isa metetdaktsü.

Nagaland Civil Secretariat-i aitsü atema Car Pass tasen agütsütsü

Dimapur, Metsüremi/March 15 (TYO): Nagaland Civil Secretariat telungi aitsü atema Car Pass tasen March 20, 2023 nü nungi tenzüka office mapang agütsütsü, ta Home Department ajanga sangdong ka nung ashi.

Anungji iba Car Pass tasenba atema Home Department, SAB 'A' branch nungi form meshir kasaji Home Department nem March 30, 2023 tashinung agütsütsüla, ta ashi.

April 30, 2023 sülen Car Passes tejenba magütsü, ta sangdong ajanga ashi.

Item Car Pass ya agitetsü: Ministers (3 nos), Advisors/Chairman (2 nos), MLA (1 no), Chief Secretary & equivalent (2 nos), Additional Chief Secretary/Principal Secretary/Commissioner & Secretary tem charge talila bena alirtem & equivalent (2 nos), Secretariat nung Joint Secretary aser tema Additional Director & Head of Department & equivalent (1 no), Secretariat nung Junior Section Officer/Equivalent jenjang aser teka (gari amshitsü mela malir) (1 no) aSer Nodal

Officer(s) (1 no).

Car Pass tem ya Government registration Number i.e, NL-10 aliba aser competent Authority ajanga melaba gari tem atema kisüng agütsütsü. Private registration number aliba gari tem nem tapi agi Car Pass tem magütsütsü. AHOD nungi totuyuba agütsüba sülen kar nembo agütsütsü.

Secretariat nung Junior Section Officer mesüra kasa jenjang aser temaba (sorkar kari amshitsü memelar) officer ajak atema car passes ya Home Department-i officer tenüng nung register süa aliba gari indang kuli kaket tem agütsüba sülen agütsütsü.

Nodal Officer(s) atema Head of Department nungi meyongnem agüja aliba Nodal Officer ama formal order of nomination agütsüba sülen gari ka atema agütsütsü.

Nodal Officer melen shia department ajungai iba Office nem osang agütsütsüla.

Taoba Nodal Officer temi yua aliba car pass tejenba sayuba sülen tasenba agütsütsü.

Directorate shia car passes asem (3) dang agütsütsü i.e, Director, Additional Director, aser Nodal Officer. Directorates koba nung Principal Director tekolakba sür ali, item nem pezü (4) agütsütsü. Secretariat nung item tesemtem nung gari ayutsü melatsü:

1. West (Gate-2) nung aliba parking lot: Car pass X aser Y aliba gari ajak
2. East nung aliba parking lot: Car pass J aser S aliba gari ajak
3. Staff Bus stand anasa parking lot tasenba: Car pass D, N aser O aliba gari ajak
4. Secretariat kima parking lot (NSSA Park/ATM anasa): Secretariat employees indang nija garitem.

Directorates aser danga establishment tem nem iba sangdong nung shia aliba quota alema agütsüba non-entitled vehicle pass tem tang nungi tenzüka memelentsü mesüra tasen kuma meyanglushitsü, ta sangdong ajangasa ashi.

T KheI SMMC ajanga Mao Market nung amener nem teyari agütsü



Kohima, Metsüremi/March 15 (TYO): Mao Market Kohima nung kitsük-kirong lendong ajuru aliba tetsür shishilempar nem March 15, 2023 nü Kohima village nung Tsütuonuoimia (T Khel) kübok Market Management Committee (SMCC) ajanga teyari agüja liasü.

Sokhriezie Market anasa aliba Mao Market ya tanaben meyanglu tashi anogoshi ajangtetba osettem ayoktsü asoshi Mao Market nung amener tetsür 39 nem langpang (table) ka-ka agüja liasü.

SMCC convener Neikiedolie Suohu ajanga complex telungzük nung yokya-yokchir temi inyaksü aser meinyaksü indang metetdaksü aser Mao Market nung yokya-yokchir tem atema bilema T Khel Council-i molungsoa Sokhriezie Market nung gari anena ayuba tesem parnok nem azüngtsü, ta ashi.

T Khel Council chairman K. Neibou Sekhose-i ashiba agi, iba tesem ya teti atemabo masü, ta metetdaksü.

Pai parnok dang telungjem nung alitsü aser kati-ka yaritepa tajungtiba nung customer den yokya-yokchitsü ajungshia liasü.

Mao Market Management Committee Secretary, Lolly Moses-ia state sorkar aser T Khel Council dang lenmang balala nungi yariba atema pelaba lemsatepa liasü.

Iba sentong nung District Disaster Management Officer (DDMO), Kohima, Thejangulie Zao-i ashiba agi, February 27 nü Mao Market, NN Market aser anasa nija ki nung kitsük-kirong lendong ataloka teraksa agütsüba asadangtsü atema state sorkari committee ka tentetogo.

Iba committee ajanga osang tejangja tekeraba nung agütsütsü, ta pai ashi aser T Khel Council ajanga khen atema shishilempar nem tesem agütsüba atema tenüngsang agüja liasü.

Sarasadem sentong ka agiba sülen BMC Kohima nung senior pastor Rev James C. Neikrhienyü-i iba market semzükja liasü.

Dimapur Government College nung Yuva Ustav sentong agiogo

Dimapur, Metsüremi/March 15 (TYO): Nehru Yuva Kendra Dimapur ajanga District Administration aser Dimapur Government College lungjemer Ministry of Youth and Sports, Govt. of India kübok "National Unity and Solidarity" omen nung ajemdaker Yuva Ustav sentong ka March 15, 2023 nü Dimapur Government College nung ayongzükka liasü. Iba sentong ya linük nung district 180 nung kasa anogo agia liasü.

Iba sentong nung exhibition balala agia takok angur nem

senpet den kulizüng kaket agüja liasü.

Item rongnung Dimapur Government College nungi K. Chunchun-i Declamation talent hunt takok ngua liasü, Unity College nungi Almina Bebe-i Photography talent hunt takok angu, Livingston Foundation International nungi Imlijungla Aier-i Young writers talent hunt takok angu.

Dimapur Government College nungi Arthonthung T Yanthan-i Young artists talent hunt takok angu aser ano

Dimapur Government College-isa painting competition aser cultural festival award ngua liasü.

Item takok angur ajak ya state aser national level tetoktepba nung shilem agütsü.

Iba sentong tenzüka mapang Deputy Commissioner, Sachin Jaiswal IAS tesemdanger liasü, Dimapur Government College indang principal Sanjay Sharma-i tarur pela agizükba o jemi aser Lalhai Singson, Secretary EU DGC ajanga sarasadema liasü.

173Bn CRPF Airfield Dimapur ajanga Civic Action Programme ayongzük



Dimapur, Metsüremi/March 15 (TYO): 173 Bn CRPF ajanga Airfield Dimapur nung aliba parnok indang Unit Headquarters nung Civic Action Programme ka June 15, 2023 nü ayongzükka liasü, kong tongti tesemdanger Kevithuto Sophie Angami, Commissioner of Police, Dimapur liasü.

Iba sentong nung B/173 Bn CRPF Camp, CIHSR Hospital, aser F/173 Bn CRPF Camp, Powergrid Colony Dimapur anasa alirtem nem solar lights 58 aser water tanks 36 lema agüja liasü.

Iba sentong nung

Commandant, 173 Bn CRPF, Ashok Kumar Yadav-i ashiba agi, küm shia CRPF temi Civic Action Programme ayongzükka agir aser iba mapang nungdabapur nem parnok asoshi teyari ama oset balala lema agütsü.

Paisa Civic Action Programme yagi Security Forces aser nürtem tsüngta apu latsür aser tarutsü nunga ka kuma lungjemtsüla, ta ashi.

Iba sentong nung Commissioner of Police, Dimapur, Kevithuto Sophie Angami-ia nürtem dang nungdakba mapang units tem

yaritsüla, ta ashi.

Kü department nunga nürtemi mashi mapang teyari atema asüngdangtetsü aser par unit-ia tajungtiba nung inyaksü, ta pai ashi. Paisa 173 Bn CRPF Units ajanga dang pelaba lemsatepa liasü.

Iba sentong nung Phaijiang village ajanga bamboo dance agi shilem agi, Heiyilung Nsarangbe Dy. Comdt 173Bn CRPF ajanga tarur pela agizükba o jemia liasü. Iba Civic Action Programme ya Dimapur aser Nagaland tesem balala nung asemnü maneni agütsü.

Kohima Law College nung World Consumer Rights Day amung

Dimapur, Metsüremi/March 15 (TYO): Alima ajunga den külemi Nagaland Voluntary Consumers' Organisation (NVCO), Kohima Law College & Pro Bono Club lungjemer March 15, 2023 nü college auditorium nung World Consumer Rights Day munga liasü. Iba sentong nung NVCO tir Kezhokhoto Savi tongti o jembir liasü.

Iba sentong nung Nocklei M, Shahyong & Yakap Shankai nungeri skit ka agi shilem agia shishilempadok osetsüet aliba mapang shishilempar temi tim masüba mapa inyakba indang sayua liasü.

Ano Muwali Sangtam, Wanjen aser Huluto nungeria consumer rights dak sendakba onük nung ajemdaker shilem agia liasü aser tang tentetba sorkar ya opposition maliba sorkar ka ama lir asünung legislator temi ola adoktsü meimlatsüla, ta ashi.

Consumer rights tem rongnung 'Right to basic needs' ya ka lir aser Nagaland nung nürtemi nungdakba 'basic needs' ya lenmang majungba, apu raksar aliba, nürtem aser talisa state yimtiba nung tzü supply maliba ajanga nürtemi küm tepiyong tzü aliba, electricity ama service majungba, government school

indang ki-o-jen majungba, health services majungba ya lir.

NVCO tir Kezhokhoto Savi-iba sentong nung jembidang India nung 'Right to Public Services Legislation' nung sorkar nürbur nem service agütsüba nung mapang telatet lir aser aibelenba nürbur tenzüker merenshitsüa mela lir, ta ashi.

Iba ozüng ya sorkar ketdangsurtemi ochimashi mapa inyakba ajemdaksütsü aser nürbur matsüngdang ochishia mapa shidak inyaksü atema yanglu, ta pai ashi.

State 14 dak tema nung iba ozüng ya benoka amshir, aser 'Right to Service Act' mapa kuma inyakba state tem rongnung 2010 küm Madhya Pradesh ya mezüngbuba state akum.

State balala nung iba ozüng ajanga mapang shidak nung rights to public services agütsüba densema lir.

Mapang shidak nung public service agütsüba rongnung caste, birth, marriage, domicile certificates, electric connection, votes card, ration card, copies of land records tem agütsüba densema lir, ta Savi-i ashi.

Iba sentong nung Pro Bono Club indang faculty-in-charge David menden liasü aser college administrator, tesayur aser law azüngtertem dena liasü.



New Delhi March 15, 2023: Parliament nung budget senden agiba mapang opposition party balala nungi MP tem Parliament House nung Opposition Lenir, Mallikarjun Kharge indang chamber nung senden amendang tangokba noksa nung angur.

Opposition-i ED office-i longkak aita ao saka police-i nokdang

New Delhi, Metsüremi March 15 (Agencies): Bodhbarnü New Delhi nung opposition party balala nungi MP tem-i Parliament House nungi Enforcement Directorate office tashi longkak aita aoba mapang Vijay Chowk nung police-i parnok nokdanga liasü.

Adani Group ochimashi ken o dak sendakba nung opposition MP temi ED office tashi longkak aita oa temepishiba shidi ka agütsütsü tebilemba liasü.

ED office-i aoba mapang nung police-i opposition lenirtem nokdangba ajanga parnok tanaben Parliament complex-i meyipa aru.

Congress Tir, Mallikarjun Kharge-i, party 18 nungi MP tem longkak aita ao aser Adani ken o bushisüngdangang ta takhangba agütsütsü tebilemba liasü ajisüaka memela, ta metetdaksü.

Parliament kima senden junga magiteti arudar. Rajya Sabha nung Congress deputy lenir, Pramod Tiwari-i, "Opposition party balala nungi MP 200 shii Adani ken o dak sendakba nung temepishiba shidi agütsütsü atema ED office-i aoba mapang nung police-i nokdang, anungji onok Parliament-i meyipa oa Parliament House telung nung longkak aittsü," ta metetdaksü.

Bodhbarnep opposition party balala nungi lenirtem Rajya Sabha nung opposition Lenir, Mallikarjun Kharge indang takdang nung mener senden mena asalentong yanglua liasü.

Parliament kima osangbener den jembidang Lok Sabha nung Congress lenir, Adhir Ranjan Chowdhury-i, "BJP-i aniba Centre sorkari iba ken o ya JPC nem magütsüner, kechiyong JPC-i parnok ochimashi jungkai adoktsütsü," ta ashi.

Police-i ashiba agi, iba tesem nungji Section 144 CrPC ozüing benoka aliba ajanga parnok opposition MP tem nokdanga liasü. Opposition party temi Adani-Hindenburg ken o jungjunga bushisüngdangtsü atema Joint Parliamentary Committee (JPC) nem agütsütsüla, ta takhangba agütsüba ajanga Parliament

2025 küm tashi nungbo küm shia cancer case lakh 15 ajungtsü: Centre

New Delhi, March 15 (Agencies): 2025 küm tashi nungbo India nung küm shia nisung lakh 15.7 dak cancer tashidak puteta liasü, ta junior health minister, Bharati Pravin Pawar-i metetdaksü.

Rajya Sabha nung tasüngdangba ka langzüdang Pawar-i, Indian Council of Medical Research - National Cancer Registry Programme-i iba ya asadangteta liasü, ta metetdaksü.

Linük nung kanga bulua putetba cancer tapu asemji-oral cancer, mama cancer aser cervical cancer lir aser cancer tapu asempronglaji National Programme for Prevention & Control of Cancer, Diabetes,

Cardiovascular Diseases & Stroke kübok lir, ta minister-i metetdaksü.

"Iba programme kübok infrastructure terenlok, human resource development, anema alibaren ajungkettsütsü, tashidak nokdangtsü aser tekarakba nung tashidak puteta treatment agitsü atema awareness agütsütsü asoshi rangloker inyaker," ta lai metetdaksü.

"Iba mapatong kübok arrshi küm 30 ser temapurtem dak cancer tapu asem-oral, mama cancer aser cervical cancer tendangtsü atema rangloker inyaker. Ayushman Bharat - Health and Wellness Screening Centre kübok item cancer tapu asem atema service agütsütsü kanga tongtibang shilem ka lir," ta laisa shisem.



New Delhi, March 15, 2023: Mapa melen ali sübokrem agiba ochimashi ken o nung Bodhbarnü Rashtriya Janata Dal tongti, Lalu Prasad Yadav New Delhi nung aliba Rouse Avenue Court matsüngdangi arudang tangokba noksa nung angur.

Aikati BJP ticket raktepajaji tim dang: Karnataka CM Bommai

New Delhi, March 15 (Agencies): Karnataka assembly election nung tokteptsüpur candidate aikati BJP ticket aginüa rakteper, ta osang prokba mapang nung Bodhbarnü Karnataka Chief Minister, Basavaraj Bommai-i, takok angutsü melung lemteta aliba party ka aser iba tensa koktettsüsa aliba lenirtem aliba party indang ticket raktepajaji tim dang, ta ashi.

Karnataka nung Congress-i taruba election atema nangzükbatem aija Bommai-i, tenangzükbatemji inyakttsüsa opposition party-i election nung takok mangutsü aser parnok nangzükba schemes ji mapa kuma inyakttsüsa masü, ta ashi.

Tasüngdangba ka langzüdang pai, "Takok angutsüsa aliba party ka indang ticket raktepajaji tim dang. Atangji (BJP nung) tetoktepa lir," ta ashi.

Osangbenertem den jembidang BJP leniri, "BJP aser party nung lenirtemi tensa ajak koktettsü. Party bangdak-i shiba nemsä ticket agütsüdir nisung ajaki parnok yaritsü aser party nem takok tulu ngudaktsütsü," ta metetdaksü.

May ita nung Karnataka assembly election agitsü lia BJP-i iba election nung assembly menden 224 nungjagi

tajemba agi menden 150 nungbosa takok angutsü nükjidong yua lir.

State balala nungi Chief Minister temi Karnataka semdanga BJP atema nübo yimtsütsü.

Karnataka election atema Congress-i tenangzükba asembo sangdongogo, item rongnung kibong shia nem ita shia electric light unit 200 angati agütsütsü, kibong nung tetsüti shia nem ita shia sen 2,000 agütsütsü aser BPL kibongtem nung züngsem shia nem ita shia jang seret 10 agütsütsü nangzükba lir.

Taküm May ita nung Karnataka nung State Assembly Elections agitsü. Züngsem 224 aliba assembly kümsük May 24 nü tembangtsü.

Assembly menden 224 nungjagi menden 36 Scheduled Caste (SC) atema aser menden 15 Scheduled Tribes (ST) atema shiteta yuja lir.

State nung vote agütsütsü temsüa alir nisung crore 5.21 lir; iba nungji tetsür crore 2.59, arrshi küm 100 ser temapur 16,976, enoch 4,699 aser tang mezüing vote agütsütsüpur lakh 9.17 dak tema densema lir. State nung arrshi küm 80 ser temapur voters lakh 12.15 dak tema lir aser matamabensar voters lakh 5.55 lir.

Central Armed Police Forces 6 nung mapa tazüing 84,866 lir: Centre

New Delhi, March 15 (Agencies): CRPF aser BSF densema Central Armed Police Forces trok nung mapa tazüing 84,866 lir, ta Bodhbarnü sorkari Rajya Sabha nung metetdaksü.

Union Minister of State for Home, Nityanand Rai-i, tesüiba ita pongu tsüingda Central Armed Police Forces nung sepa 31,785 shimogo, ta metetdaksü.

CAPFs nung mapa tazüing

adokba ya sepa kar mapa nungi anisüngzükba, mapa nungi anenba, promotion anguba, asüba, battalion tasen tentetba aser post tasen adokba ajanga lir, ta Union Minister-isa metetdaksü.

Rajya Sabha nung tasüngdangba ka langzüdang Minister-i, January 1, 2023 tashi nung CRPF nung mapa tazüing 29,283 liasü, BSF nung mapa tazüing 19,987, CISF

nung mapa tazüing 19,475, SSB nung mapa tazüing 8,273, ITBP nung mapa tazüing 4,142 aser Assam Rifles nung mapa tazüing 3,706 liasü, ta metetdaksü.

Rai-i, January 1, 2023 tashi nung Central Armed Police Forces nung doctor mapa tazüing 247 aser nurse den medical professionals mapa tazüing 2,354 liasü, ta metetdaksü.



March 15, 2023 nü Patna nung BJP MLA tem Assembly senden nungi ayazüka aluba sülen longkak aitba noksa nung angur. Budget senden nung BJP MLA, Lakhendra Raushan anentsüba agi parnok longkak ait.



TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 16, 2022

Temelenshi tajung karbo imlar

Nisungbo kasa asütsüa akok saka government-bo tasen asünungji, tamajung aika jembiaka, nübertemi Nagaland nung temelenshi tajung karbo arutsü imlar. Item temelenshitem rongnungji Nagaland ya benjong lima dang masü saka mapa shitak inyakli benjong mongli ta asüba state ka kümdaktsütsü teimla tulu lir. Alima nung nisungtemi benshiba sobaliba rongnung tajung kaji benjong amongba sobaliba ya asütsü, kechiyong benjong ya anibelega inyakba mapatem ajak khen nemdaka toktsür pelatepa amongba mapang lir. Aji oda, chiyongtsü agi süshia, yar tsüngsang agi süshia mesüra saisapong tapu balala agi süshia, kechi agi nisung pelateper, item ajakji benshia asen kija masü saka pur medemer aser bendangertem dena jaoka pelatepba mapangji benjong ya lir. Atangji, benjong amongtsüba ya temela masü, kechiyong süoshi tajung agir pur den chiyongtsü tajung talubosa chiajema amongtsüba sentong atemaji senotsü aika nungdaker. Iba denji ano benjong dak sendakba yartsüsang aser saisapong nung shilem agitsü meteta alitsüla aser item sentong atemajibo jelia terenemshiba alitsü nungdaker. Itemji kodang bilemdangdir, mapa inyaktsübo majungshi aser mapabo magütsü ser benjong alitsü kija ajungshira, iba jagi nübertem sensak atentsü aser oda-odabo benjonga mongnüyonga, makamaitba agi, memongtetsüsa akümtsü. Aji oda, asenok sobaliba benjongbentsü amongba mapang aser yimya indang kodang shisadangdir, alu mapa tapu ka temli benjong ka mongli, ano alu mapa tapu ka temli ano benjong ka mongli ta mapa o benjong na ya sendaktepa aliba angatetsü. Tanüa kasa tangatetba nung, benjong amongba ya mapa inyaker ama mebilemi, mapa inyaker külen pelatepa amongba mapang dang benjong ajar ta asüba tangatetba nung, nisung ajak mapa inyaker kaka kümdaktsütsübaji government sentong nung alitsü imlar. Ano, government tasenba dak teimla kaji nübertem den külemi lia nübertem nungdak reprangteta inyaktsütsü imlar. Atangji, election nung toktepertem asoshi pei nübertem den külemi lia parnok taginüba angadangtsübaji election mapang ya lir saka election temer government nung alirtem asoshibo nübertem den külemi lia parnok nungdak inyaktsütsübaji parnok teinyaktsü akümer. Government nung nübertem asoshi sentong balala atonga inyaktsü bilema jajar asünungji, atangji aibenbo pei constituency nung memongtetsüa akok, saka ita nung khenbo anogo ka ana agiteta pei constituency nung nübertem den külemi shisalemsatepa mongra, iba jagi pei nübertem nungdak aika reprangteta inyaktsütsü. Ashiko, government nung alirtem aikati pei nübertem majurunüba, shisa tasen ka lemsateptsü mesüra lenmang tasen kar teyuteptsü asoshi masü saka sen meshitsü asoshi dang ajurunüba nübertem asüba agi majuruner asütsüa akok. Ibayongji, benjong mapang arudang balaka, government nung alirtem aika pei nübertem majurutsü tebilemba nung bendang lima nung oa amonger. Tangbo nübertem dak tashiomait liaka, iba ama tangatetba tila aser jakla tamajungji endoker nübertem majurunüba agi bendanglen oa endokba mapang aser senotsüji nübertem asoshi amshitsü imlar. Ano, nübertem asoshi teimla talila kaji, government nung tasen pur aika lir aser tasen purtem rongnunga ano lanurtem aika lir. Item jagibo tejen pur aser taintem dang nungi kanga agia tajungba shisa tasen (new ideas) bener arua, talisa, Nagaland nung government school aser mozü kitem jenjang tajungba küma melenshitsu imlar. Aji oda, tasenpurtemi balaka lanurtem dang pei lima nung peisasa pei akok mapa tenzüka inyakdaktsütsü lenmang aika sayutetsü imlar. Ano, teimla tasen kaji, government nung tetsür anati anir meshitak aser meindang mapatem okdok tenzüksü imlar. Teburtem kijai yimsüsüba mapang Nagaland kanga raksaogo, aji yanglushitsübaji tetsür anati ketdangtsüba department nungi tenzüksü teimla tulu lir. Atangji, kasa nisungi dang anir asünungji, manger sangwa nung Nagaland tajungba küma melenshitsu meimlar saka mapa meinyaki sen bendenba jakla endoker, mapa inyaker chiyongba aser mapa inyaker benjong amongba sobaliba ka tenzüksüshitetra, aji Nagaland tajungba küma melenshitsu tenzüker asütsü.

OLEMSABANG

KODA ASÜTSÜ SUNDAY SCHOOL SHIBANGER

~ P. Renthly Jamir

Tsüngremi yangluba süngdonglidong shiruru ozüsangno ango ajak moaja tejang rena tangang aser jenti kümang ta moatsü. Ano meimchir dang soyapokya jenti renang aser alima süngdakjang ta ashi Lipok 1:22-28. Tsüngremi kodanga ishika kümang, tanur ka ana sor numenden shibanga yuang (Birth control) ta ashiba kecha mangur. Noa dang Abraham aser Yakob nunger dang Anüng Petinu ama Molu lisem ama rendaktsütsü nangzük. Sura kechiba numenden nung tanur tepseta endoker. Tsüngremi tebursang aser tetsüla yanglubaji jenti soyapokyatsü yanglu. Hindu tetsürtembo tebuba anema yujang ta lumia anogo ka Mahashivratri amunger ano kiyi maortema tebur ka moajang ta külemi amunger. Tsüngremi amia sangrema alitsü meyangu. Abrahami Sarala sür tetsür tasen Ketura agir tanur aika sotsüba Lai nung angur.

Tanu India nung birth control, birth control ta nübu temeki küma aoba tongtibangsa Nagaland nung tanur masor nisung agi anungseta aliba kuli aika angur. Alima otsü nung Matalokdangba Kum ter yongsük census 2001 to 2011 nung Nagalima rangben nung nisung kati maso tasübabo 9436 (0.47%) 2001- 1988636, 2011 nung 1978502. Meyitoku noklang pezü semer trok agi ajem. Aser yimdak yimtsungtem nung melinür rural nübu 14% decreased aser urban towni aoba 69% increased. Yimtem tazüng akümer, Dimapur nütsüng renloker. Kechiyong asen Naga nung urban area ta asübaji Dimapur dang lir. Mokochung, Tuli, Mangkolemba, Changtongya towntema rural area den kasa, Dimapur leni omaogo.

Tang alima nung nütsüng teimtibaji China Lima lir. Parnok kibongshia tanur ka one child policy tasür tanur ka dang asotsü kari tali Sora senchi agütsür, takartemi tanur ana asor. Saka one child policy jagi tebur million 70 sangremtsüsa aküm kechiyong tanur ka atemabo ajaki tebur dang asor, tetsürbo tepok nung alidang raksa endoker anungji ka asoba nungi ana tashi asotsü ozüng melenshi. Saka ano tanur ana asoba agibo nübu agi mepirir.

Linük nung nübu agi meperi factory aser industries ajak nung nübu agi meperi teinyaker mali mapa majeter anungji tanur tali asembose asotsüla tasür China relaxes two limit child policy allowing couples to have upto three children 31-05-2021 ozüng yangluogo. Pi takar temeteter lima South Korea nunga tanur ajema asoba nokdangtsü weekly working hours government aser company ajak nung Ghonda 68 inyaka aliba 52 kümja taliba jenjang tajungba akümtsü employment tali adoktsu, quality life atema melen ta 01-03-2018 sangtong.

Tsüngremibo alijak süngdakjangta ashir saka America aser England limatem nung nübu onsara ajema asor. When the America birth rate has reached its lowest level for the year the number of births in Great Britain is also showing decline. Akidang Muslim nungertemi alima nütsüng tali rendakja tetsür asem pezü agitep saka parnoka tetsür tali magitsü ozung yangluteper. Bangla Tax for Extra Wives ka dak tali agira polygamy Extra Tax sen 10,000 Taka £78 agitsü ta city Mayor Rahmani sangtong. Anungji aji agia alima nütsüng tali renlokba ajemer. Meimchiri Tsüngremi soyapokya jenti renang ta ashiba anema birth control sentong jenti yanglua zuinbabo nokdangteter saka tasürbo kata menokdangteti alima nung akümlir jentisa jenti anojungi asü yimi aor. Asotsü nokdangteter asüba sota meyteter.

Tang alima nung nütsüng teimtiba aliba lima China nunga nübu agi meperi factory, industry nung nisung nungdaker ta shiogo. Kechiba yamaji ataloker ta süra tasen asor dang nungi tasür teimba. Tasüba tsutsu reprandangra wara Shira Tulu COVID-19 ama ayawara menok nok agi meimchir million aika khen nung takum Samar. Iba alima tesem ajaklen kin o kin na raratepa nübu jenti anogoshia asur. The majority living in the 20th & 21st Century have lived through a culture of war. Ashiba agi 1985 nung UN peace keeping 10,000 dang liasü saka 1993 nungbo 75,000 koba küm shia dollar billion asem endoker. Ano UN osang ajanga ashiba agi alima tzü mopung menenba ajanga nisung million aika 2050 Tashi nung tasüba ajurutsu aser azu memerükba agi tetsür tebur tanur asotsü aliba Samar tapung male and female (fertility) akümtsü ta ashir. Lai nunga yamai Hosea 4:10 nung parnoki jabojaru inyaktsü saka mezüintsü. Aser Tang repranga arunung asen lima nung anojungi tebenjem mapang tasüba aika ajuruba aser kibong akümer teimba tanur maso tapungla angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Myanmar nung Khristantemi Tenla ki tasen ka yangluogo



March 12, 2023 nü Myanmar kübok Kachin State nung aliba Lana yim dak St. Stephen Catholic Arogo Tenla ki semzükba anogo nung Khristantem aser Internally displaced persons (IDPs) adenshia aliba noksa nung angur.

March 15, 2023: Tang rara aliba Myanmar linük tezülen Khristantem aser internally displaced people (IDPs)-i longjemer Tenla ki tasen ka yangluogo.

Kachin State kübok Lana yim dak St. Stephen Catholic Arogo Tenla ki ya March 12, 2023 nü tongti putir, Raymond Sumlut Gam densema putir aseme meshiteta semzüksüogo.

Gam-i, 2011 küm nübur aika jena aoba sülen tang China arrtsülen aliba yim dak IDPs meyirjang aika jenoka lir, anungji parnoki Tenla ki ka kanga nüngdaka liasü, ta ashi.

"Iba ya Tsüngrem nungi temoatsü lir. Iba yim dak tayongzükba aika aliba mapang nung yimdaklirtemi achaayanga Tenla ki yangluba atema pelar," ta pai metetdaksü.

Tenla ki tasenba ya kyat sen million 7 indoka lungro agi yanglu aser iba Tenla kidang nisung 200 tashi asemstü, ta tongti putirisa metetdaksü.

Iba yim ya Banmaw Arogo kübok lir aser iba tesem ya kanga tezülen asüba agi kiojen yangluba nung sen aika adoker.

Lana yim dak nung ya Catholics aser Baptist Khristan kibong 40 shi dang liasü, ajisiüaka IDPs aika arua jenoka aliba ajanga tangbo iba yim dak Khristan nütsüng aika renlokogo.

Tangalen nungi jena arua alirtem teimbaka Baptist Khristantem lir, ibayongji yim dak Baptist Arogo Tenla ki ka yangluogo, ta parnoki metetdaksü.

Tang nisung 2,507 shi Lana IDP camp nung jenoka lir aser iba camp ya Kachin Independence Army (KIA) telok kübok lir, ta United Nations Office for the Coordination of Humanitarian Affairs (UNOCHA)-i metetdaksü.

2011 küm June ita nung ceasefire anenba sülen sepaitem aser KIA tsüngda rara tenzükba ajanga Kachin state nung

amenoka aliba camp balala nung nisung 89,000 shi jenoka lir.

Iba dak alia 2021 küm February ita nung sepaitemi democracy sorkar atsüngdokba sülen nisung

11,900 shi Kachin state nung jenoka lir.

Kachin state nung nütsüng million 1.7 lir aser nütsüng teimbaka Khristantem lir.

Khristan nütsüng aika aliba state tem- Kachin, Kayah, Karen aser Chin states nung Tenla ki aika raksatsüba den ki aika rongdoktsüogo.

Nütsüng million 54 aliba Myanmar linük nung nütsüng shilem 6 shi Khristantem lir aser nütsüng shilem 89 bo Buddhist yimsü amangertem lir.

Taküm January aser February ita kija nunga nisung 154,000 dak tema jenshiogo aser ibaji densemabo linük tesem balala nung nütsüng million 1.3 jenshia lir, ta March 4, 2023 nü UNOCHA report ajanga metetdaksü.

Alima nung asentenshi milak tenzükogo: Michael W. Smith

March 15, 2023: Grammy Award angur aser Khrista osangtajung kentener, Michael W. Smith-i, alima nung asentenshi milak tenzükogo aser tanü Tsüngremi mapa inyakdar, ta ashi.

Osangbener den jembidang Michael W. Smith-i, Tsüngremi alima tesem balala nung mapa inyakdar ta pai amanger, ta metetdaksü.

"Langka atalokdar aser ibaji kuli süa angutsüa ni taküm aliba agi ni kanga pelar," ta pai ashi.

Tawa Vietnam linük nung sayutsüngir, Franklin Graham-i ayongzükba asentenshi sentong- Spring Love Festival nung Michael W. Smith-ia ken ajanga shilem agia liasü.

Anogo ananü sentong nungji Luu Chi Vy, Isaac Thai, Le Nguyet Anh aser Naomi Nguyen nungeri ken ajanga shilem agiogo.

Vietnam nung ayongzükba evangelistic crusade ya linük telung nung sorkari melaba

mezüngbuba crusade liasü, ta pai ashi.

Iba crusade mezüngbuba anogo jelia Michael-i, pai iba tesem nungji ola ka angashiba sülen pai iba olaji anishia ao; iba olaji Vietnam nunger Khristantem adenshia aliba süki ka nungi adokba ola liasü, ta ashi. "Parnoki ola tashie adoka sarasadema liasü," ta pai ashi.

Pai iba tatalokbaji pa indang social media account ajanga lemsatep.

Pai twitter ajanga, "Vietnam semdangtetba atema ni pelar. America nung temelenshi adokba atema pelar. Ajisiüaka yangia temelenshi ka adokdar, yamaji alima tesem balala nung temelenshi adokdar! Ajioda südakjang Amen," ta lemsatep.

Tekülem aser tetushi lenir, Michael-i, "Tang alima nung Tsüngremi mapa inyakdar. College aika nung asentenshi milak janrudar aser mapang tetemsü nung Khristan film "Jesus Revolution" aser "The

Chosen" sayaa kanga nungtuagu akümer," ta ashi.

"Tang iba ya atalokdar ta ni bilemer. Asenoki mapang talangka nungi iba atema sarasadema liasü aser tang atangji ataloker. Tamang asentenshidar," ta paisa shisem.

March 4-5 anogotem nung sayutsüngir, Franklin Graham-i Spring Love Festival sentong nung Vietnam nunger den Khrista osangtajung lemsateptsü atema Vietnam tonga aoba mapang nung Vietnam Deputy Prime Minister, Le Minh Khai aser Ministry of Foreign Affairs, Ministry of Home Affairs aser Government Committee for Religious Affairs nungi tongi ketdangsertemi pa agizüka liasü.

2023 küm Open Doors US World Watch List nung alima nung Khristantem alitsü linük tamajungtiba 50 rongnung Vietnam ya jenjang 25buba nung lir.

ANOGO ABEN TSÜNGREM DEN

Talang nung anguba

T.Ken 73:18-28

"Nai ne shisatsü agi ni anitsü, aser tesülen sentsüwangshidaki agizüktsü" (t.24). Asaphi tarendak mapang ka ajanger külen iba tekong ya zülu, aser ibai pa temulung makai aruba tesüngmangtsü ka tembanga zülu. Pai tejangja temetetba kar angu.

Mezüngbuba, Tsüngremi asenok sotter. "Aji saka maneni ni ne den lir: Nai kü tajichi teka nung sot" (t.23). Tamajungeri azü tokshiba inyaksü akok, peria akatsü akok, azükaru aser temoatsü akatsü akok. Saka asenok Tsüngrem aka aser pai asenok sotter.

Tanabuba, Tsüngremi anir. "Nai ne shisatsü agi ni anitsü, aser tesülen ne sentsüwangshidaki agizüktsü" (t.24). Tesülenbaji tongtipangba mapa lir. Tesülen kechi ataloktsü? Asenok Pa den teti alitsü ta asenoki jangjatsü akok. Iba temang nung tang takar süa aliba aser tarutsü taküm nung takar süa alibaji tera balala lir. Iba lima nung takar kar tarutsü aliba lima nung sensaker asütsü akok. Saka iba lima nung sensaker aika taruba lima nung takar alitsü.

Tasembuba, Tsüngremi asenok tashi itdaksür. "Kü shi aser kü mulungjangi tamakok angur: saka teti Tsüngrem kü mulungjang tashi aser kü shilem lir" (t.26). Pezü, Tsüngremi asenok taküm jenjang ajak nung yarir. "Saka na anasa arutsü ni asoshi junger" (t.28). Asenok kong lidir liang, kechi ajanga odir oang, asenoki Tsüngrem anasai aotsüla. "Pa mapa ajak ashitsüa ni Kibuba kü jenokdak kümdaktsüogo" (t.28).

Kotak nung Kibuba den ki ka akatsü tenangzükba agi asenok tasü itdaksür. Tsüngremi na jenjang tulu agi alizük, aser Pai na kechisarena ajanga kümzük. Kechi tejangja tenangzükbatem asenok aka!

Church of England-i kasa kiyimertem kulizüng agitsütsüa akok

March 15, 2023: Kasa jembia aruba sülen taoba ita tetsür o tetsür na mesüra Church of England General Synod nung vote agütsütepa Church of England nung tebur o tebur na kibong kümer alirtem Arogoi moatsütsü agütsütsü asoshi Parliament atema telemtetba agia liasü.

Anglican-ibo, kasa tetsür o tetsür na mesüra tebur o tebur na shi nung medemba mesüra kibong akümba ya Laishiba tesayuba anema lir, ta tangatetba nung maneni nokdaker.

Tang UK nunger ozüng kübok tetsür o tetsür na mesüra tebur o tebur na kiyimba kulizüng agitsütsü atema putirtem nokdager.

Taoba mapang cabinet survey ka ajangabo, UK minister aser tang Labour MP, Ben Bradshaw-i iba atemaji bill ka benoktsü aser bill ji agizükra kasa tetsür o tetsür na mesüra tebur o tebur na kiyimba kulizüng agitsütsü atema Church of England nung temelunger putirtem nem temelaba agütsütsü.

Tesüiba küm trok tashi telemtetba agi.

AO OSHI ANGAZÜKDAK:

TANÜ ANGAZÜKTSÜBA OJANG

Penshilu

(n) küm asembuba tashi ayimba tekong lu (consecutive third year of jhumming)

* Alu tajung asüba agi ozüi penshilu lu ayim.

Pento

(n) tezü nung atangba aonsotsü tapu ka (sponge gourd)

* Pento zü süngdong talangi züa atur.



OLONG PAITEP # 6457

	1		2			3		4		5
6								7		
						8		9		
			10							
11										
				12						
13		14		15						16
17										18

TIPIEN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Repranzük
- 10. Tasola
- 11. S _ _ _ _
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaket
- 14. _ _ _ hi
- 16. Akümüli nungi pilar

OLONG PAITEP # 6456 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.



ALOKBA ELECTION NUNG ADOKER SOBANGBA TENA JEMBITEPER

Sobangba : Temba, nenok MLA temi Opposition-less Government ta ashiba tetezü ya kechi?

Alokba Sobangba : Telongjem nung tashi lir ta ashirba ati. : Ajibo ajaki metetta lirja. Haka Opposition-less tajangzük ya kechisa asütsü?

Alokba : Ena, Naga yimden latettsü atema telung nung alirtem dang longjemang ta sayutsüba atema, kari lemang majungba, light maruba, pipe nung tsü maruba, ita sen manguba, central nungi project aser scheme balala atema sen yokba achiba koba dang corruption ta ajar, iba amala anema public temi jembidang onok MLA ajak ola madoki telungjem nung support süteptsü aser telungjem nung tashi lir ta mapa agi sayutsüba atema.

Sobangba : Wah, election campaign mapang nung terenlok (peace and development) indang jembibato koda?

Alokba : Ayah, election nung adoker opposition nung amen nung kechi lab alia kato na. Nia election expenditure bosa make up süner ati.

Sobangba : Oh, temba Alokba, makaka, Nagaland bo yakta jungtir!

Lilir : WhatsApp

Assam nung mapa manguba lanur lakh 12 shi lir

Guwahati, March 15, 2023

(Agencies): Assam nung mapa manguba lanur lakh 12 shi lir ta chief minister Himanta Biswa Sarma-i Assam Legislative Assembly nung metetdaksü.

"State sorkar department balala nungi osang angazükba agi state nung mapa manguba lanur 12,36,299 lir" ta pai ashi.

CM Sarma-isa Uttar Pradesh den medemdanga jembidang "Yogi'er sorkari küm pungu tsüngda mapa lakh 2 agütsüba indang advertisement metetdaksüo saka Assam sorkaribo küm ka tsüngda ken o kecha melii aser süpokrem medeni mapa lakh 1 agütsüo" ta Sarma-isa ashi.

Assam sorkari mapa lakh 1 agütsütsü maparen tenzükogo aser May ita nung nisung 40,000 nembo mapa agütsütsü, ta finance minister Ajanta Neog-i yashi shia liasü.

"Tesüiba mapang mapa 40,000 nung nisung anioktsü mapa inyakogo. Tanüngba mapatem nung nübotem yakta anioktsü" ta Neog-i ashi.

BJP sorkari March 31, 2022 tashi nung mapa lakh 1 adokdaksütsü ta nangzükba atema Independent MLA Akhil Gogoi-i asüngdangba langzüdang lai iba osang lemsatep.

"Nisung lakh 1 anioktsüba mapa tenzükogo. Iba ya tembangba sülen shilem lemsar nisungtem anioktsü" ta laisa ashi.

Sorkari sabang balala nung mapa nung aniokba osang tai lemsateper aser candidate karbo mapa balala nung shimoka lir, ta Akhil Gogoi-i ashi.

"BJP-i küm ka nung sorkar mapa lakh 1 agütsütsü nangzük saka ibaji meinyaket" ta paisa metetdaksü.

Külen, CPI(M) MLA

Manoranj Talukdar-ia minister Ajanta Neog ajanga telangzüba agütsüba nung temulung masüba metetdaksü.

BJP-i küm ana shi tejakdang sorkar aküm saka nangzükba ama meinyaker, ta Talukdar-i ashi.

Tesüiba küm ka ser tesadang nung Assam sorkari mapa manguba lanur 40,000 tema nem mapa agütsüo.

February 22 nü Fishery & Veterinary Department atema appointment letter agütsüba sentong nung CM Sarma-i mapa lakh 1 agütsütsü nangzükba ama inyaksü ta shia liasü.

Assam nung Engineering indang diploma courses kübok polytechnic kaketshirtem tem State Council of Technical Education, Assam-i recognition agütsütsü ta cabinet minister Jayanta Mallabaruah-ia metetdaksü.

Union minister Bhounik-i Tripura MLA menden toktsür

Agartala, March 15, 2023

(Agencies): Union minister of state for social justice and empowerment Pratima Bhounik-i Tripura assembly nungi sodi agiogo aser la maneni union council of ministers nung züngsem asütsü.

Tripura assembly elections nung Pratima ya Dhanpur assembly constituency nungi takok angu. Lai CPI (M) candidate Kaushik Chanda madak takok ngua liasü.

La ya chief minister inyaksü nübo ka ta bilema liasü saka central BJP lennirtemi aser talisa Union Home Minister Amit Shah aser BJP national president JP



Pratima Bhounik

Nadda nati Dr Manik Saha-ia ang chief minister inyaksü shim.

Election nüboyimba sentong piyong Amit Shah-i Dr Manik Saha ya BJP indang chief ministerial face ta jembio.

Pratima-i state Pratima nung

inyaksü jangra saka BJP central lennirtemi la nem iba maongka magütsü aser iba jagi lai MLA menden nungi anentsü ta BJP osang ajanga ashi.

"Ni Dhanpur assembly Constituency nungi takok angu aser ni tang mapa ana bena lir saka ibaji inyakyim agi memelar anungji ni menden toktsütsü" ta Bhounik-i ashi.

"Ni Lok Sabha MP aser Union Minister of State ka süaka BJP central leadership-i kü dang assembly election nung tokteptsü tetuyuba agütsü. Party-i ashiba tashi angaa ni Dhanpur constituency nungi MLA menden toktsür" ta laisa ashi.

Meghalaya nung Bihar nunger na ket nung ganja seret 71 apu

Guwahati, March 15, 2023

(Agencies): Mongulbarnü East Jaintia Hills district nung nisung ana ket nung ganja seret 71.4 bena lia apu.

Tena ya Babalu Singh (56) aser Saranja Mahto (39) na ta jangjaogo aser tenaprong Bihar

nungi lir. ANTF team aser anti-infiltration Umtyra CP staff yaritepa tena apu.

Mozü shibelener ana gari ka nung senzür ta osang tejangja angazükba sülen lenmang nung mita atadang tena apu.

Tena mena aliba gari nung

packet 117 nung ganja miima bena aliba angu, ta ketdangsurtemi ashi.

Iba dak sendakba nung Khliehriat police station nung NDPS Act kübok ken o ka benokogo aser maneni bushisüngdang südar.

GOVERNMENT OF NAGALAND
DIRECTORATE OF INFORMATION & PUBLIC RELATIONS
IPR CITADEL, NEW CAPITAL COMPLEX
NAGALAND: KOHIMA

NO. DIPR/CP/2022 **Dated Kohima, the 16th March 2023**

EXPRESSION OF INTEREST FOR PRODUCTION OF PSAS

The Department of Information & Public Relations, Nagaland, and the Nagaland Building and Other Construction Workers Welfare Board(NBOCWFB) proposes to produce two documentaries on the following topics:

- (i) Immigrant Workers engaged in Nagaland in the building and construction sectors.
- (ii) Internal Migration within Nagaland amongst Nagas in the search for livelihood through building and construction sectors.

Expression of Interest (EOI) in this regard is hereby invited from interested agencies and production houses that have experience in the production of public interest documentaries. Last date for submission of EOIs is 24th March 2023.

Details of the Terms and Conditions may be collected from the Directorate of Information & Public Relations, IPR Citadel, New Capital Complex, Kohima, Nagaland during office hours. For any queries, contact 9485210300/7005525145.

Sd/-
DZÜVINUO THEÜNUO
Director
Information & Public Relations
Nagaland, Kohima.

Tang tashi Pakistan police temi Imran Khan meputeter

Lahore, Metsüremi/ March 15 (Agencies): Bodhbarnü Lahore High Court ajanga police dang Lahore nung aliba Zaman Park nung operation agia aliba asüngnep tashi magi anena atatsü totuyuba agütsü, kong ozüng amshir temi Pakistan Tehreek-e-Insaf (PTI) chairman Imran Khan aputsü meranger saka ghonda 24 jungnüaka meputeter.

Lahore High Court ajanga iba totuyuba magütsüdang yongi Pakistan Super League mechi police temi PTI tekolakbar kidang nungi meyipa ao tenzüker liasü.

"Tang tasayadak Pakistan Super League (PSL) 8 cricket match matem tashi police tem Khan'er kidangi maotsü," ta police ketdangsür temi ashi aser mapang tatsüka lir police aser security ketdangsür tem Zaman Park yutsür aoba nguogo.

Police tem ainshiba sülen PTI tekolakba par kimai mask agir adoka par party pur ajurua liasü.

Police temi taoba Pakistan ato kilonser meputetba sülen court totuyuba mapa kuma inyaksü atema Punjab Rangers tem Bodhbarnep Zaman Park nung par kidangi arua liasü.

Khan'er kidang PTI workers adenshia aliba senshidaktsütsü mechi police temi tear gas khaloktsü.

Mongulbarnü nungi tenzüka iba tesem nung police aser PTI züngsemtem tsüngta raratepdang sepai 54

ascer civilian ti yiru, ta mozüki osang ka ajanga ashi.

Khan busemer aser police tsüngta aonung tepiyong raratepa liasü aser police temi tear gas khaloktsü aser PTI züngsem temi long agi ona liasü. Iba mapang police temi PTI workers kar apu.

Court totuyuba inyaksü asoshi police temi Mongulbarnü nungi tenzüka sepai telok tulu kati iba tesem lungbang, saka nüburtemi par lenir aputsü asoshi maongka magütsü.

Kasa mapang Information Minister Marriyum Aurangzeb-i ashiba agi, Zaman Park nung police tem teka tezüng liasü aser PTI tekolakbai linük nung civil war adokdaksüner.

"Imran Khan aputsüba den sorkar tesendaktep kecha mali," ta minister-i ashi.

Khan ato kilonser inyakba mapang pa indang political opponent ajunga tepuokdak ayu aser sorkari pa aputsü meranger ama pai sayur, ta lai ashi.

Taoba ato kilonser Khan-i Twitter nung noksa ka lemsatepba nung par mita oa pa aputsü merangba mapang amshiba teargas terep tem sayua liasü.

"Tang tesüsa Rangers temi amakba, political party tulutibai army den rarar. PDM aser Pakistan tsükchir temi yamai inyakner. East Pakistan lendong nungi kecha mangazük," ta pai ashi.

Rangers temi par ki lungbangba sülen PTI

chairman-i tweet balala nung, police temi injang khaloktsü tenzüko aser parnok nükjidongji pa pua tepsettsü merangba lir, ta shia liasü.

"Shinga dena maden ta jembiba Establishment dang ni ya asüngdangner: Ibai nenok shinga dena maden ta jembibaji asü masü, Rangers temi teka tazüng longkak aiter aser political party tulutiba indang lenir den rarateper, kong par lenir ozüng alema aputsü totuyuba agüja lir aser ken o okadak lir aser nisung tamajunger temi kumteta aliba sorkari pa pua bener oa tepsettsü meranger?"

Anü adoktsü lia Khan-i PTI indang Twitter account nung video ka lemsatepba nung pa Pakistan aser party indang nisan jakdan langpang ka nung mena liasü, kong teargas canister tem yua liasü.

"Ni tanü linük ajunga dang ya ashir, parnok ano maneni renema lir, parnok ano arutsü," ta pai ashi.

"Parnoki asen nübur dak teargas khaloktsütsü aser iba ama danga mapa inyaksü, saka yamaji inyaksü parnok dak temeden mali ta nai meteta alitsüla."

"Kilir aser tetsürtem aliba ki telung nung parnoki water canon aser teargas khaloktsür. F-8 Katcheri leni ni maoba ya danga kecha agia masü saka iba tesem nung kiralongrar temi anaben lendong agüja lir. Security mechi ni mao ta parnoki meteta lir, aser tang parnok renemshir," ta PTI tekolakba Imran Khan-i ashi.

North Korea-i missile ana tendangba jangjashitsüogo

Pyeongyang, Metsüremi/ March 15 (Agencies): North Korea-i missile ana tendangba osang jangjashitsüogo, aser ashiba agi, iba ya mapang mashi ka nung missions benoka inyaksü aser nungdang dang süra tsükchirtem samatsütsü asoshi military unit tem nem training agütsütsü atema apitetba drill nung shilem ka lir.

State news agency KCNA-i Bodhbarnü ashiba agi, missile tendangba ya "demonstration drills" lir.

Osang ajanga ashiba agi, surface-to-surface tactical ballistic missiles ana ya South Hwanghae province kübok anüolen tzüküm nungi khaketa yok, koba linük adena kilometers 611 shi orr linük anütokyiplen tzüküm nung asetkong tila ka nung yuja aliba target dak oa khashia liasü.

"Parnoki rara tenzükra kechi südir süaka tsükchirtem samatsütsü ta shiogo aser unit

indang commander-i mapang mashi ka nung pa mapa shidak benoka inyaksangshitsü atema renema alitsü aser fire assault company ajak nem training tali agütsü tenzüksü," ta KCNA-i ashi.

South Korea indang military-i Mongolbarnü North Korea-i missile ana tendangba lazükogo, ta metetdaksü.

South Korea aser United States na Freedom Shield ta nungja agütsür anogo 11 joint exercises ayongzüka agiba mapang tang tesüsa North-i iba missile ana tendangogo.

Iba military exercise ayongzüka agiba ya Pyongyang-i par linük amaktsü atema renemshiba ka ama züngshir aser ashiba agi, iba ajanga linük ana yagi parnok rongmesoba kuli agütsür.

Tawa Pyongyang-i hadir balala tendanga arudar, kong submarine ajak akhaba hadirtem aser short-range ballistic missiles tem densema

lir.

North Korea-i otsüsütsüsa taoba küm missile aika tendangogo. Parnok indang hadirtem modernize asütsü merangba mapang ka nung parnoki iba jenjang agia arudar.

Kasa mapang nung parnok indang nuclear hadir tendangba tesema yanglushiba lazükogo aser iba ajanga 2017 küm sülen tang mezüngbuba nuclear ka tendangtsü asoshi parnok sentong yanglur asütsü ta temulung meleme bilemer.

North Korea-i iba jenjang agiba ya South Korea indang military-i aitsüogo aser missile tem kanga atonga tendangba ajanga linük ana temeket nung yimjung aser security amokmerener ta shiogo.

US State Department otongdar-ia missile tendangba ya United Nations Security Council bangzük aika nung aibelenba lir ta shia North Korea aitsüogo.

TENÜNGSANG AGÜTSÜR

Mokokchung Town Longsa Kaketshir Telongjem tejak tenteta Akangkokba Jamir aser Imlimenla Lemtor na jabaso Sunep A Jamir nem tenüngsang agütsür, shibai NEXA Musing Season 2 nung Top 4 jenjang tongteta yimer nem konang bener arutsü.

Nai jangraba inyaktetsü nü dak temolungtetba lir. Tanü na nüma dangteta alitsü ta amanger aser nü jakdang tayongzükatem madak takok angutsü nü dak Union-i tamang akar.

Sd/-
Onentiba
President, MTLKT



Sd/-
Limayangla Jamir
Gen. Secy. MTLKT

Office of the
Tuli College, Borbora Ward,
P.O: Tuli - 798618, Mokokchung, Nagaland

GENERAL PUBLIC INFORMATION

This is general public information for all concerned that Tuli College has introduced Computer Training class in partnership with Nagaland Institute of Electronic & Information Technology Kohima, under Ministry of Electronic & Information Technology, Government of India (NIELIT).

The IT Training will be imparted in the following courses :

1. Computer fundamental and financial accounting and Book Keeping (Three months certificate course)
2. Computer application and Networking (CAN) (6 Months Diploma Course)

The Computer Information Technology Training is opened to all the interested individuals from different walks of life.

Interested individuals may collect Admission forms and Prospectus form the office of the Tuli College during College working hours. The said IT training courses will commence from the First Week of April 2023.

Sd/-
I. Nukshi Jamir
Administrator

Ukraine tarutsü tia anüdoklen tongpang nung keta lir: Zelenskyy

Kyiv, Metsüremi/March 15 (Agencies): Ukraine indang ajurutsü tejangja ta tarutsü tia ya Bakhmut aser linük anüdoklen tongtipang yimti aser jila nung raraba dak keta lir, ta Tir Volodymyr Zelenskyy-i ashi.

"Anüdoklen kanga sashia rarar, temolung kanga shiranger. Asenoki tsükchir tashi samatsütsü nungdaker aser asenoki samatsütsü," ta Zelenskyy-i aonungshi linük den video ajanga jembiba ama Hombar aonung jembidang ashi.

"Bilohorivka aser Marinka, Avdiivka aser Bakhmut, Vuhledar aser Kamyanka aser danga tesemtem nung asen tarutsü tia asoshi lemtetsü. Yangji asen tarutsü tia, Ukraine nung ajunga tarutsü tia atema rarar," ta pai Russian sepai den raraba tesem tongtipang tem tenüng tetshia ashi.

Sepai nung alir ajak dang pelar, ta pai ashi.

Bakhmut rakzükba ajanga Donetsk region ajunga amokbangtsü atema lenmang pa lapoktsü, ta Russia-i shia lir.

Hopta aika azüdokshia rara aruba sülen Ukraine mitkar temi Russian sepai nem takoksa tulu agütsütsü mechi Bakhmut nung maneni raratsü tebilemba lir, ta shia lir.

Sen yong raraba Wagner mercenary army temi anir Russian sepaitemi Bakhmut anüdoklen agiogo aser tawa

Ukraine nung tamakok ajurutsü tejangja ta sangdongaka iba yimti lungbangtsü makoker.

NATO-ia Bakhmut ya anogo ishika tsüngta laotsü ta tekumdangtsü shia liasü.

Bakhmut nung Ukraine sepaitemi Russian sepaitem tashi temdaksür, kong Russia-i temolung agütsütsüsa akum aser tashi tali indoker.

Bakhmut north tsütsü Kreminna anasa yoka aliba Ukraine sepaitemi Russian sepaitem meindoker, ta Hombar nung ashi.

Bakhmut nungi mile pongu shi pilar arem nung Ukrainian artillery ajanga Russian sepaitem alidak bomb pokloksü aser meta nung kanga sashia raraba ola tanen makai angashir.

Bakhmut asoshi raraba ya social media nunga angur, kong Russia nung temi osang tiazi prokshir.

Hombar nung Ukrainian Centre for Strategic Communications ajanga ashiba agi, Russian sepaitemi takok nguogo ta osang tiazi Facebook nung prokshir.

Ajisüaka iba yimti nung tang tashi nisung 4,000 dak tema lir aser item rongnung tanur 33 lir, ta Bakhmut ketdangsür temi Hombar nung ashi. Rara metenzükdang iba yimti nung nütsüng yongsük 75,000 shi liasü.

Women's World Boxing Championships meraketa tenzükogo



India boxing Team

New Delhi, Metsüremi/March 15 (Agencies): 13buba IBA Women's World Boxing Championships 2023 Bodhbarnü New Delhi, Indira Gandhi Sports Complex nung tenzükogo. Iba asayamung ya March 26 tashi asayatsü.

Iba asayamung ya Boxing Federation of India (BFI)-i ayongzüka tang agi tasembububa India nung asayadaki. Iba asayamung ya New Delhi nungsa 2006 aser 2018 küm ayongzüka asayaogo.

Iba asayamung ya Sports Minister Anurag Singh Thakur-i Bodhbarnü tenzükja liasü.

Sentong nung o jembiba

mapang pai, India nung iba asayamun anaben tashi kanga takok ngua ayongzüka asayaogo aser tang agi tasembububa iba asayamung ayongzüka asayatsü atema maoka agütsüba atema IBA tir dang kanga pelaba lemsatapa liasü.

Maneni pai, India jenjang 44buba nung aliba nungi tasembububa tashi tongtetba atema boxer tem aser BFI tir-i anir par team nem tenüsang agüja liasü.

Asayamung lapokba sentong nung Honourable Union Minister for Youth Affairs & Sports Anurag Singh Thakur,

IBA tir Kremlev aser BFI President Ajay Singh nunger den iba asayamung brand ambassador MC Mary Kom, aser alakteta jaoker Bollywood star Farhan Akhtar nungeri shilem agia liasü.

Taküm iba asayamung nung linük 65 nungi boxer 324-i shilem agitsü aser weight category 12 nung takok angurtem nem sen crore 20 senpet agütsütsü.

Iba asayamung nung India tsür 12-i shilem agitsü, kong 2020 Tokyo Bronze medallist, Lovlina Borgohain aser 50kg category nung world champion, Nikhat Zareen nata densema lir.

2030 football World Cup atema bid asürtem rongnung Morocco densemogo

Metsüremi/March 15, 2023 (Agencies): 2030 football World Cup ayongzüka asayatsü atema atema bid asür Spain aser Portugal na den Morocco-a densemogo.

Mongolbarnü iba osang sangdongba ajanga bid nung Ukraine-i shilem agitsü magitsü mejangjai kümogo. WC atema bid asütsüba osang nung King Mohammed VI-i sign sür liasü aser Confederation of African Football senden ka nung zünga metetdaksü.

"Morocco chuba yimli-i 2030 World Cup ayongzüka asayatsü atema Spain aser Portugal na den külemi joint bid ka benoktsü telemtetba agiogo," ta sangdong ajanga metetdaksü.

"Iba bid ajanga Africa aser Europe, northern aser southern Mediterranean aser African, Arab aser Euro-Mediterranean limatem longjemdaksütsü. Iba ajanga onok ajak dak kechi tajungtiba ali aji temai

adokdaksütsü," ta sangdong nungsa shia lir.

2026 küm asayamung ayongzüka asayatsü atema maangka manguba sülen Morocco-i, 2030 bid nung shilem agitsü atema küm pezü tejakdang telemtetba agia liasü. Parnok Iberian linüktem den mapang tatsükabo sensaksama aruogo ajisüka parnok bid nung officially anioka maliasü.

Taoba küm October ita Spain aser Portugal na Ukraine den longjema liasü, ajisüka parnok bid nung shilem magitsü imlar.

Spanish football federation nungi otongdar kati AFP news dang, parnoki Portuguese aser Moroccan football federation tem den Bodhbarnü ajuruteptsü ta ashi ajisüka Ukraine indang kecha meshisem.

"2030 World Cup atema candidacy indang news ya tir temi Kigali nung sangdongtsü," ta otongdarisa ashi.

Taoba küm Qatar nung World Cup asayaba mapang Morocco-i kanga junga asaya Arab aser Africa linüktem rongnungi semifinals tonga asayaba mezüngbuba linük aküm, ajisüka parnok semifinal nung France-i tsükdaksü aser Croatia makokba sülen pezububa nung tembanga liasü.

Taküm February ita Morocco nung FIFA indang Club World Cup ayongzüka asayaogo.

2030 World Cup atema host ya 2024 küm September ita shimtsü imlar. South America aser Europe nungi linüktem longjemer bid südar aser parnok rongnung ka nem temelaba agütsütsü imlar.

1930 World Cup mezüngbuba ayongzüka asayaba linük Uruguay-a Argentina, Chile aser Paraguay den külemi bid südar.

2026 World Cup nungi tenzükja team 48 asayatsü, kong asaya 104 asayatsü.

Mkg nung March 21 nü 'State Level Judo Tournament' akatsü

Mokokchung, Metsüremi/March 15 (TYO): Khelo India 10 Ka Dum Women League sentong kübok "Empowering women through sports" omen dak ajemdaker Nagaland Judo Association Mokokchung (NJAM)-i Mokokchung town nung tetsürtem atema 'State Level Judo' asayamung ka 21st March, 2023 nü ayongzüker, ta osang ka ajanga metetdaksü.

Iba ya Judo Federation of India, Sports Authority of India (SAI) aser Ministry of Youth Affairs & Sports, Govt. of India ajanga achayanga agiba maparen ka lir. 10 Ka Dum kübok India lima yimti balala nung saisapong/asayamung tapu balala ayongzüka akatsü sentong renema lir.

Iba judo asayamung ya tetsür temeja atema dang lir aser

touzük telemsa (weight categories) ajak indang alitsü. Iba nung takok angur nem kulikaket den medal agi senpettsütsü.

Shilem agitsü janrartem aser sponsorship/advertisement aginürtemi 18th March, 2023 tashi nung iba number - 8798437988/9436006256 nung tongteprateptsü mepishir, ta osang ajangasa metetdaksü.

Erling Haaland-i asaya ka nung goal 5 idaktsü

Metsüremi/March 15, 2023 (Agencies): UEFA Champions League nung RB Leipzig aser Manchester City na asayaba mapang Erling Haaland-i goal pongu idakja liasü. Iba asaya akokba sülen City pur quarterfinals-i iogo.

Asaya 25 nung goal 30 idaktsüba sülen Haaland-i taoba mapang Manchester United aser Real Madrid striker Ruud van Nistelroy-i otsü tasen yanglur aliba ajatetogo, shibai asaya 34 nung goal 30 idaktsür liasü.

Arishi küm 22 ser anogo 236buba nung Champions League nung goal 30 idaktsüba sülen Haaland-i Kylian Mbappé ajatetogo, shibai Messi indang record ajateter liasü.

Halland-i iba season tetoktepba ajak nung goal 39 idaktsür lir. Ajisüka pa dak tali metaloker asayaba atema City pur aitsüogo, shirnok taoba küm Borussia Dortmund nungi Haaland arua adenba sülen kanga takzüteta kümogo.

2008 küm club kibur melenba sülen City puri Premier League amokbaner asaya arudar

ajisüka Champions League nunbo parnoki junga masayateti arudar aser 2021 küm dang final tongteta lir. Final asaya nung parnok Chelsea-i tsükdakja liasü.

Asaya nung mezüngbuba goal ya Haaland-i minute 22buba nung penalty ka ajanga idaktsü. Iba sülen minute 24buba nung Kevin de Bruyne-i metsüba ball ka bar nung ondaker adokba tongokja pai asaya nung tanabuba aser Champions League nung pa atema goal 30buba idakja liasü.

Asaya mezüngbuba shilem tembangtsü atema mapang apuloktsür asayaba mapang Haaland-i tasembububa goal idakja liasü.

Asaya tanabuba shilem tenzük minute pezü dang orr lia Ilkay Gundogan-i City atema goal pezububa idaktsü aser maneni Halland-i minute 54 aser 57buba nung ano goal ana idakja liasü.

Iba asaya nung City atema tatembangbuba goal ji De Bruyne-i idakja parnoki asaya goal 7-0 agi ayong ayonga koka liasü.

2023-24 Season atema India nem AFC Competition Slots 3 agütsü

Metsüremi/March 15, 2023 (Agencies): AFC competitions 2023-24 atema India club tem Qualifiers April 4 nungi May 3 tashi asayatsü. Iba asayamung atema India nem slot asem agütsüogo.

AIFF-i ashiba agi, Asian Football Confederation (AFC)-i, AFC Champions League Group Stage nung ka, AFC Cup Group Stage nung ka aser AFC Cup Qualifiers atema ka ta slot asem agütsüogo.

Indian Super League Shield 2021-22 (Jamshedpur FC) akokba team aser 2022-23 season (Mumbai City FC) nung kasa asayamung akoba team na April 4 nü AFC Champions League Group Stage atema asayatsü. Iba asaya ya Super Cup asayaba tsüngda asayatsü aser osang tejangjaba mapang tatsüka lirang agütsütsü.

Iba asaya akokba team AFC Champions League 2023-24 Group Stage nung indang indanga asayatsü.

AFC Cup Group Stage atema 2021-22 I-League season akokba (Gokulam Kerala FC) team aser Super Cup 2023 (TBD) akokba team na asayatsü.

Super Cup 2023 akokba team Slot 1 atema qualify

süatoker lira Gokulam Kerala FC AFC Cup 2023-24 Group Stage atema qualify asütsü. Gokulam Kerala FC-i Super Cup 2023 kokra parnok AFC Cup 2023-24 Group Stage atema qualify asütsü.

Slot 2 atema asayatsü nüngdaka kümra iba asaya April 29 nü asayatsü.

AFC Cup 2023-24 preliminary round atema ISL 2021-22 Trophy akokba team (Hyderabad FC) aser ISL 2022-23 Trophy (Bengaluru FC mesüra ATK Mohun Bagan FC) akokba team asayatsü.

Hyderabad FC Slot 2 atema qualify süatoker lira Slot 3 atema qualification asaya ka asayatsü nüngdak madoktsü aser ISL 2022-23 akokba team AFC Cup 2023-24 preliminary round nung asayatsü.

ISL Trophy 2022-23 akokba team Slot 2 atema qualify süatoker lira Slot 3 atema qualifying asaya ka asayatsü nüngdak madoktsü aser Hyderabad FC AFC Cup 2023-24 preliminary round nung asayatsü.

Slot 3 asayatsü atema nüngdaka kümra iba asaya May 3 nü asayatsü mesüra AIFF telemtetba dak ajemdaker asayatsü.

BILEMDANGANG

"Lemsateptsü memulungra takokja amajok."